

入大乘論卷下

靜七

聽法故有邊

堅意菩薩道

譏論空品第二

問曰汝先說調順乘大苦乘得妙果報菩薩  
所得境界甚難了知答曰菩薩行處微妙甚  
難於三阿僧祇劫乃可成就無量百千萬億  
那由他劫在凡夫中無有出世之法如尊者  
提婆所說偈

無量億劫中常在凡夫地汝今應當知

未來亦如是

是故菩薩行處甚大亦復難得散亂衆生得  
聞甚難能說亦難況復修行如尊者提婆所  
說偈

生得值法難聽說亦復難生死雖無際

問曰尊者先所說十地願時爲我分別演說  
何等爲菩薩十地答曰初歡喜地二離垢地  
三明地四焰地五難勝地六現前地七  
深遠地八不動地九善慧地十法雲地云何  
名歡喜地出過凡夫得不思議出世間道心  
生歡喜故名歡喜地云何名爲離垢地離破  
戒垢故名爲離垢地云何名明地依十二門  
禪得明智慧故名爲明地云何名焰地得增  
上覺意分別道品燒煩惱薪功德熾然故名  
焰地云何名難勝地修習十智雖伏煩惱未  
能勝故名爲難勝地云何名現前地能逆順  
觀十二因緣得法現前故名爲現前地云何  
名深遠地愛佛功德智慧次第不聞餘心深  
入法相故名深遠地云何名不動地離色等

相堅固難動故名爲不動地云何名善慧地入四辯才解一切音聲隨其所問於一剎那頃悉皆能答故名善慧地云何名法雲地能受一切佛法猶如大雲能注法爾故名法雲地是名菩薩具足十地如是十地是菩薩安住行處亦能滿足一切智慧如十地經中之所廣說若能如是知菩薩十地者是名善知安住行處亦名善知菩薩廣大功德處所亦名善知如來無量功德廣大處所若不能如是知者我今立決定誓當知是人於菩薩法及如來法皆悉不了菩薩摩訶薩從初發意乃至十地常修四行如寶頂經中說善知無明行諸波羅蜜行分別道品行成熟衆生行如是四行總入二輪所謂福輪智輪菩薩諸地悉具二種智果福果問曰云何成就二果

答曰初地福果爲閻浮提王第二地福果爲轉輪聖王主四天下第三地福果爲天帝釋第四地福果爲焰摩天王第五地福果爲兜率陀天王第六地福果爲化樂天王第七地福果爲他化自在天王第八地福果爲千世界梵第九地福果爲二千世界梵第十地福果爲三千大千世界淨居天王如華嚴經廣說如來出生果報及攝受世界是名菩薩福輪云何名菩薩智輪初地菩薩於一剎那頃得百三昧見百諸佛神通能過百佛國土能動百佛世界光明徧照百佛世界能成就百衆生能知過去百劫未來百劫能入百法門能現百身復爲一身以百菩薩莊嚴眷屬若以願力復過於此百千萬億無量無邊亦非等數譬喻所知若身力若光明力若神通力

若眼力若聲力若行力若莊嚴力若住持力若解脫力造衆善業是名初住菩薩於刹那頃成就如是無量功德二住菩薩得十三昧如是廣說三住菩薩得十萬三昧餘亦如初住廣說四住菩薩得億三昧餘亦如初住廣說五住菩薩得千億三昧餘亦如初住廣說六住菩薩得萬億三昧餘亦如初住廣說七住菩薩得億百千那由他三昧餘亦如初住廣說八住菩薩得十三千大千世界微塵數三昧餘亦如初住廣說九住菩薩得十佛世界百千阿僧祇微塵數三昧諸餘功德如初住廣說十住菩薩得十佛世界不可說不可說億百千那由他微塵數三昧諸餘功德如初住廣說於一剎那頃乃至見十佛世界不可說不可說億百千那由他微塵數諸佛如

初住菩薩於一剎那頃見百佛世界乃至成就百衆生十住菩薩亦復如是問曰如佛所說一世界中無二佛出云何菩薩見十佛世界不可說不可說億百千那由他微塵數諸佛答曰諸佛說言一世界中無二佛者爲彼鈍根小心衆生不爲利根大心者說如汝經中說一世界無二轉輪聖王無二佛出然諸四天下實有衆多轉輪聖王諸佛出世亦復如是問曰釋迦牟尼佛亦能徧一切佛國何必餘佛答曰若如汝言但一佛能徧滿一切世界者不應有過去大釋迦牟尼佛七佛出世得成正覺是以我言多佛無過假使釋迦牟尼佛神力能徧一切世界令無量諸菩薩等廣修萬行功德滿足皆當成佛無有一人獨成正覺而障諸菩薩使不成佛無有是處

如阿舍枯樹法輪及餘諸經說是經時有六十比丘漏盡意解俱得阿羅漢果菩薩亦爾功行齊等同時成佛當知十方有無量諸佛又金沙阿舍二部經說有佛始成有佛現在有佛滅度復次說偈

過去無量佛 未來亦復然 及今成佛者  
皆滅於愁憂 一切尊重法 念本皆修行  
未來亦復然 正覺法如是  
曇無魏多亦說是偈

頂禮一切佛 漏盡無有上 無量諸佛身  
正覺最勝尊 正覺所生處 并及得菩提  
能轉正法輪 入無漏涅槃 若住若經行  
如來之所坐 卧如師子王 我今皆悉禮  
上下諸世尊 方面及四維 法身與舍利  
敬禮諸佛塔 東方及北方 在世兩足尊

七

厥名曰難勝 彼佛所說偈 若以此偈頌  
常讚於世尊 生死百劫中 終不墮惡趣  
如佛爲尊者目連說言非汝退神足但是舍  
利弗以神通力用其衣帶繫難勝座如是等  
佛而汝經中自作此說況摩訶衍辯明諸佛  
無量無邊等於法界同虛空界諸佛世界悉  
有諸佛初地菩薩身行清淨雖有結使而不能  
擾七住菩薩不名斷結亦不名有結云何  
名不有結不斷結以不爲結使所擾故名爲  
無結愛佛功德故名爲有結第二阿僧祇劫  
滿足得於八地一切行具足無有所作一切  
結使盡故得成菩薩空靜住處得滅盡定如  
阿羅漢如是得無生法忍若諸佛不勸請者  
即於彼定入無餘涅槃如經中說得無生法  
忍離煩惱障如阿羅漢得寂滅無餘離於生

死得十自在何等爲十壽命自在得心自在衆具自在作業自在生處自在解脫自在神通自在願自在法自在智自在得如是自在善修如意足故降伏四魔何等爲四陰魔煩惱魔死魔天魔爲衆生故皆悉一味得無緣明慈猶如如意藥樹隨衆生所願皆使成就

問曰云何菩薩自身作業能令衆生隨願令得答曰菩薩以慈心爲體猶如見毒而能殺人衆生見菩薩故便得利益問曰八住菩薩已盡結使云何最後身菩薩生羅睺羅答曰誠如所言若最後身菩薩有實欲者乃至無佛可得況羅睺羅問曰云何無佛答曰若毀戒無尸波羅密若無尸波羅密則無諸波羅密如佛所說若無戒則無施無施則無忍無忍則無精進無精進則無禪定無禪定則無

智慧無智慧則無一切諸功德無一切諸功德則無佛無佛則無羅睺羅汝何以疑生羅睺羅有結無結八住菩薩無諸煩惱如阿羅漢以方便力故現受五欲作諸過惡捨四天下轉輪王位令使衆生得厭離心猶如娑留枝比丘說佛本偈

一身爲多身 作已極爲勝 非實亦非虛各各令喜悅 放恣生欲意 盛壯狂所亂現同行於欲 引令到彼岸 禪智能燒滅欲界諸結使 欲結甚狂逸 能示現其心菩薩觀欲知如幻夢是故以此令轉其意大悲菩薩作諸幻術而化其心問曰云何作此幻術誑惑衆生答曰菩薩常以四攝法方便教化一切衆生同事利益爲破結使故如翅燒菩薩本事因緣以欲狂心擔負死屍走喚

歌舞菩薩方便示現同彼爲除彼女熾欲憂患故現同事不名妄語一切菩薩方便同事皆非妄語世間幻術以有利益菩薩得無量解脫如幻三昧門諸有所爲能大利益成就

衆生故無有過問曰羅睺羅爲是應化爲真

實耶答曰二俱無過菩薩身者即是天身如

本起經說佛告阿難如來爲衆生故出現於世不以天身轉於法輪何以故欲令衆生不懈怠故佛以天身得成正覺非我凡夫之所

能成以是故天中天爲憐愍衆生故示現世

間有其父母妻子眷屬若是幻化現有羅睺羅此亦無過若是實人亦無有過菩薩方便得不思議解脫住於大地成就衆生互爲化生父母兄弟妻子問曰羅睺羅是菩薩耶答曰不但羅睺羅獨是菩薩住迦毗羅衛城諸

釋種童子阿難難陀提婆達多阿菟樓駄等皆是大力不退轉菩薩如婆羅樓志於本行經中所說偈

或是大丈夫 或是佛所化 提婆達多者  
大仙之同伴 或復爲父子 常作內眷屬  
菩薩有大力 權變能爲此 共佛及餘人  
菩薩諸大仙 阿難難陀等 那律釋摩男  
跋陀與絅沙 夢婆絅麗等 作父子眷屬  
咸皆共圍繞

問曰提婆達多於五百身中常與菩薩而作大怨云何復言名菩薩耶答曰提婆達多非佛怨耶何以故若提婆達多是佛怨者菩薩修善提婆達多恒造諸惡云何世世得與菩薩共俱相值以是義故提婆達多非菩薩怨譬如二人各行一人趣東一人向西步步相

遠而常違背云何爲伴得相值耶若提婆達多是菩薩怨者如來世尊應有大過問曰有何過耶答曰若爾者佛非一切智亦無神力是爲愚癡則不能得擁護衆生非金剛身如來便應有餘業不能斷盡云何知佛非一切智如來在者第七闍崛山爲提婆達多推石所壓而不覺知是故當知如來非一切智云何名爲無有神力提婆達多持杵打害不能禁制以是當知無有神力云何名爲愚癡現見害至而不知避是以當知爲愚癡耶云何名爲不能擁護衆生提婆達多作五逆罪而不救度是以當知不能擁護衆生云何名非金剛身轉輪聖王以少福報而無怨害何況如來轉法輪王爲石所壓身血流現當知如來非金剛身云何名有餘作業不能斷盡爲他所

打當知如來餘業不盡若欲令佛無是過者如來便應悉滅怨敵但以善巧方便欲令眾生起獸惡心現作逆害墮於地獄欲示業報不可壞故又復欲爲墮地獄者歸依如來請佛教護又爲來世豪貴之人入佛法中若有恃其勢力復以鞭杖加打於人令此衆生便作是念如來之身猶被毀害況我凡夫薄福德者汝言逆罪但是菩薩善權方便如是逆罪名雖有五而實有三破僧害佛如是等業世間所無提婆達多是大賓伽羅菩薩爲遮衆生起逆罪故現作二業墮於地獄菩薩摩訶薩隨所應作以化衆生乃至現同魔業令魔波旬以三玉女顯現如來無欲之相又兩刀劍一切鋒稍顯現如來無瞋恚相亦無貪愛及愚癡相問曰天魔來意欲壞如來正覺

之心汝云何言欲顯如來無貪瞋耶答曰不爲遮斷何以故若如來出過魔界猶爲魔遮者大梵天王亦出魔界云何不遮菩提是道之妙果無能奪者亦無與者故不可壞言魔擾亂凡有二義何等爲二一者實有惡業爲魔所擾二者爲進新學令心堅固爲魔逼試實是菩薩真善知識現作魔來增益功德譬<sup>如</sup>道路以恐畏故疾度險難猶如好牛以少鞭杖則得調利問曰天魔亦有是菩薩耶答曰非但此世界魔是菩薩十方世界魔王者多是菩薩如維摩詰經中所說十方世界作魔王者多是住不可思議解脫菩薩能乞手足頭目髓腦如是言者皆是住不可思議解脫菩薩何以故若非菩薩者未堪斯事譬如香象蹴蹋非驢所及唯諸菩薩乃能行耳如

彼廣說以是義故當知菩薩善知衆生種種所行爲欲顯其功德智慧方便力故或現作殺殺者作乞乞者問曰若羅睺羅實是菩薩者云何復言聲聞阿羅漢耶答曰菩薩亦名聲聞亦名阿羅漢何以故令一切衆生聞阿彌陀三藐三菩提故名聲聞於一切天人阿修羅應受供故名爲應供菩薩摩訶薩爲化衆生故現作聲聞阿羅漢問曰諸餘聲聞亦是菩薩也答曰諸餘聲聞亦有是菩薩者如法華經中舍利弗等五百弟子悉是菩薩皆當作佛一切聲聞皆是阿鞞跋致菩薩如不退轉法輪經中廣說以是故當知菩薩皆現爲聲聞問曰一切聲聞皆成佛不答曰聲聞成佛此亦無過問曰云何無過答曰先斷結障後斷智障淨治諸地向一切智是以無

過問曰燒滅結使如焦穀芽云何得佛答曰若如汝言斷滅結使不得成佛者汝及一切衆生皆具諸煩惱即應是佛汝意若謂具煩惱人非是佛者離煩惱者應當得佛汝言燒煩惱結如焦穀芽而不成佛亦無是處我不欲令具煩惱種生佛法芽汝癡無智顛倒解故謂煩惱爲佛法種阿羅漢初斷煩惱後除智障修菩提道得成正覺阿羅漢寧有少斷智障者有不斷者有得無諍三昧者有不得無諍三昧者有得五神通者有不得五神通者有得四辯者有不得四辯者有得禪自在者有不得禪出入自在者何以故不斷一切智障故問曰云何名爲智障答曰出世間無明名爲智障猶如娑羅留枝本行中說偈

無明有二種 世間出世間 世間無明行賢聖已遠離 愚癡無妙解 不能如實知依止此心識 法界諸險處 未能及本原云何決定出 法身證涅槃 唯佛能了知佛婆伽婆乃能知其體性智慧及大悲斷結是名聲聞所斷智障聲聞有二種一者勤修禪定是鈍根人二者迴向菩提能斷智障是利根人樂行禪者如寶良經說猶如水精終不能成摩尼寶珠聲聞修禪亦復如是終不能成菩提果也此是諸佛境界非我所知一乘多乘今但略舉其義以明佛教不相違背我未能了譬如長者遠行疲極現作化城此經中說但有一乘實無有三佛亦自說唯有三乘更無二三間曰如來以何行得斷結使而成佛耶答曰經中說言佛告阿難能修四

如意足者若住一劫若住多劫乃盡生死一切諸經皆同是說若汝言無煩惱者我亦如是若有親愛信歸於我當爲汝說問曰云何住壽答曰阿羅漢無煩惱與八住菩薩同善修如意足故能隨意住世乃至盡於生死羅睺羅賓頭盧等盡住於世爲以此身住世爲更有餘身住若以實身而住世者則無其義若變化身住壽多劫斯有是處亦如僧祇中就青眼如來等爲化菩薩故在光音天與諸聲聞衆無量百千億那由他劫住如彼天中

菩薩以方便力示現受生非是真實如維摩詰語彌勒菩薩言無生可得云何如來授仁者記一生當得阿耨多羅三藐三菩提爲過去生未來生現在生若以過去生過去生已滅未來生未來生未至現在生亦無住故如觀過去未來現在生皆不可得是故我說八住菩薩於第二阿僧祇劫盡有作行住無作行如阿羅漢斷結使而說偈言

從初發意來 方便行諸地 得到第八地  
自在盡諸結

### 順修諸行品第三

問曰如向所說八地菩薩善斷煩惱一切結使云何成佛得一切智答曰菩薩摩訶薩除身諸惡寂滅結使離於生死遊戲自在金剛力士常隨護助獲得清淨金剛之身如如來

藏經中廣說得四辯智淨治第九地於二千梵中得自在力能善說法爲大法師能入如來秘密之藏淨治第十地得無量無邊禁呪方術能令一切自在無礙作摩醯首羅天子亦爲一切世間依止問曰所言摩醯首羅者第七爲同世間摩醯更有異耶答曰是淨居自在非世間自在汝言摩醯首羅者名字雖同而人非一有淨居摩醯首羅有毗舍闍摩醯首羅其淨居者如是菩薩鄰於佛地猶如羅縠障於一剎那噴十方世界微塵數法悉能了知能以口吹十方世界皆大震動又以一身徧一切佛國亦如皇太子初受職時以已業力故大寶蓮華自然化出受一切種智位坐寶蓮華王座有無量菩薩亦坐蓮華上而自圍遶坐寶蓮華已十方世界諸佛放大光明

照此菩薩受灌頂位如轉輪聖王長子受王位時受灌頂已即於彼坐斷除智境微細之障得首楞嚴三昧毗楞嚴三昧法華三昧得一切寶法決定三昧不可思議解脫三昧甚深無畏海水三昧微妙清淨離垢三昧諸法平等無言說三昧乃至金剛三昧得如是諸三昧已悉無障礙一切行滿足覺一切智障成阿彌多羅三藐三菩提成正覺已得如來十力得四辯智十八不共法能徧至一切佛國得一切諸佛不壞法身徧滿一切法界一切身口意業相皆悉除滅得無爲寂滅處登如來地有二因緣於一切世間顯現色身悉以本願無作業力二以衆生分別想異是故能作種種色像皆悉應之是名如來無礙法身問曰如經中說從初出家能住佛法名爲

法身答曰此事不然汝若以是名爲法身唯法無佛則無三歸若欲令具三歸依者始從初地乃至十地在淨居天成於正覺自在應化名爲法身具足三寶問曰若以如是名法身者虛誰無實何以故如來具足功德捨兜率天降閻浮提上於王宮於後邊身得成菩提云何而言於淨居天成佛道名爲法身耶答曰非閻浮提成佛十地功德非欲界法況於閻浮提得成正覺我先不言八住菩薩盡一切結漏能作千世界梵王九住菩薩作二千世界梵王十住菩薩作三千大千世界梵王以誓願力故生淨居天斯有是處於閻浮提實身成佛者則非其義以是義故當知淨居天成佛非閻浮提乎問曰假使生於閻浮提得成佛者亦能於三千大千世界而得

自在答曰此事不然何以故福德果報決定有處汝不知故而作是說若釋迦牟尼衆生閻浮提於三千大千世界得自在者於一切十方世界亦應自在問曰縱令十方皆使自在復有何過答曰若爾者但是一佛世界十方諸佛則無因果復次如諸經說皆謂釋迦如來王領三千大千世界不言乃至十方世界若如汝語則無因果如經中說諸佛出世國土衆生皆是依報各有齊限是故當知在淨居天成於正覺領三千大千世界非閻浮提問曰若佛非閻浮提成正覺者如來四塔則無利益答曰我先不已說耶若以結使因緣受身則無成道無戶波羅蜜若無戶波羅蜜則無諸波羅蜜若無諸波羅蜜則無佛若無佛則無四塔問曰汝之所說皆非義理何

以故一切諸部論師皆說一切諸佛皆從闍浮提出而釋迦如來生於林彌尼園在伽耶城坐於道場成等正覺於波羅奈而轉法輪拘尸那城入般涅槃是故汝言非也答曰此事不然何以故我意不欲令諸如來於此而

出在首陀會天而成正覺若首陀會成正覺者則無王宮生亦無出家亦無成道何以故若爾如來便無親族亦無生處亦無有滅如法華經智照經如來出生經皆廣說如來不生不滅迦葉亦自說言我依一切種智出家當知此義即是示現如來不生於金棺內而出其脚迦葉致禮則明如來不滅是故當知如來法身不生不滅問曰如來都無少生滅耶答曰我今依理正說如來實無生滅非爲虛妄如來但以方便示現生滅皆是不可思

議爲化衆生故如佛於修賴經中說我於娑婆世界若以實身現者則無一人而受我化是故此處最爲甚深亦是秘密亦名顯現皆爲下根衆生智慧微淺不能得知甚深之法是故方便爲現斯事以偈頌曰

大乘甚深廣 顯現易可說 鈍智心狹劣  
聞則懷驚疑 真是佛子者 能知其甚深  
今乃真實說 但爲求佛者 成就於二乘  
人天諸利根 受福乘此乘 是名大乘道  
大乘能出生 聲聞緣覺道 若遮大乘者  
云何得諸果 卷七 猶如諸字本 十六離本則無字  
若離摩訶衍 亦無一切乘 鈍根少智者  
不信於大乘 以不能信故 則無一切乘  
自利而兼他 是名無上乘 是故當親近  
乃至成佛道

是義甚深難可顯現不應處處而爲人說問曰雖不得一切處說應爲能解者說若發大心增長智慧應爲是人具足分別如前所說答曰有四不思議所謂佛不思議禪定不思議龍神不思議業報不思議佛不思議應顯現法唯有利根衆生從盧舍那佛以來所說諸法悉能堪受問曰云何得從彼佛以爲次第乃至今耶答曰如來法身爲化衆生有四方便何等爲四一者多檀多羅波羅比地二者多檀多羅尼比致三者阿彌多波羅比致四者阿彌多羅比致此四深妙秦言無以譯之故存胡本耳問曰若如來法身常是寂滅無相無爲云何而得隨順有相答曰以本願力故如入滅盡定比丘雖無心想以先要心若打捷起聲發至耳隨其聲發即得出定苦

第七

十七

薩亦復如是發菩提心本誓願力若使我得寂滅法身爾時心識雖復無相以無作力故教化衆生是故如來無相法身便能普應隨順有相如三千大千世界百億兜率天百億炎摩天皆悉俱時示現色身現色身已或復捨壽或現入胎或現初生或作釋梵四天王等接事左右或現行七步或現師子吼或復自言天上人間最尊最上是後邊身斷生老病死或現童子或現入宮或現出家或現苦行或現坐道場或現降魔或現初成佛或現覺悟衆生或現久成佛或現釋梵請轉法輪或現成熟不成熟衆生或現度脫已成熟者或現當入涅槃或現已入涅槃或現閻浮提全身舍利分身舍利或現兜率下來乃至現度脫成熟衆生隨應所見皆爲現形或復數

數示現或復暫時示現如是說者名真實義

終不三阿僧祇劫修行諸波羅密而成四十五十年果便滅盡耶云何當說因如須彌只羅山等果如芥子微塵分許是故汝說即是顛倒如我法中乃可令使因如芥子果如須彌只羅大山此合斯義是故三阿僧祇因得盡一切生死果報應化衆生法身常存如法華壽量所明亦如文殊師利受記品中說也彼云何名爲多但多羅尼比致如佛所說我作佛事已竟語諸比丘我涅槃時到如是十方諸佛亦復如是爲化衆生故作如是語其實不滅一切佛國神通變化皆與虛空法界齊等是故當知法身是常色身應化故無常若以色見佛音聲求如來是人行邪道

不名爲見佛

以是義故以法身觀佛名真見如來如蓮華比丘尼見佛色身便作是念我最先見佛佛言汝不先見我唯須菩提識於法身已先見我是故當知位階十住名見法身若禮法身即禮一切色身如佛於法華經中說若人稱名供養觀世音法身者勝供養六十二億諸佛色身何以故以其位階十地得佛法身亦名菩薩亦名爲佛以是故知法身爲本無量色身皆依法身而現化出是故佛便假說六十二億恒河沙色身不如供養一法身乎如佛於寶積經中所說如是迦葉如世間人月初出時恭敬禮拜至其盛滿而不恭敬何以故從初以至滿故如是迦葉若善男子欲恭敬我者先當敬禮菩薩何以故以佛從菩薩

地得滿足故乃至經歷生死變化色像利益  
衆生以是義故彼已得佛果是佛實說非虛  
妄也問曰若未入菩薩地者受具戒比丘得  
爲禮不答曰得禮以初發心菩薩勝於一切  
聲聞辟支佛故如尊者羅睺羅所說偈

若發深心如生菩薩故爲一切之所恭敬

第十九

問曰云何受具足戒比丘而禮不具足戒未  
入正位菩薩耶答曰應禮菩薩何以故聲聞  
戒要須受得盡壽便捨菩薩發心成就自性  
第一義戒解脫戒是故聲聞雖受具足戒猶  
應禮彼未入正位菩薩以菩薩體性不殺遠  
離刀杖乃至蟲蟻盡無殺心而有慚愧如是  
廣說體性不盜乃至體性不邪見如波羅提  
木又戒命終時捨罷道時捨菩薩大士性戒  
成就乃至道場終不中捨以是義故雖受具

戒應爲作禮問曰成就體性戒者乃可供養  
不應禮拜答曰不然以有戒功德故亦應禮  
拜豈但供養汝言不受戒菩薩不應向禮我  
今復當爲汝廣說不但以白四羯磨故而受  
具足戒如毗尼毗婆沙中說有十種受具足  
戒菩薩有種種受戒何等爲十如佛自言善  
來比丘自然已得受具足戒如摩訥迦葉自  
誓因緣受具足戒如憍陳如見諦故受具足  
戒如波闍波提比丘尼以八法受具足戒如  
達摩提那比丘尼遣使受具足戒如須陀尼  
那耶沙彌論義受具足戒如耶舍比丘等善  
來受具足戒如跋陀羅波楞伽三歸受具足  
戒如邊地第五律師受具足戒中國白四羯  
磨受具足戒是以菩薩常受具足戒未曾捨  
離問曰若被法服菩薩得禮白衣菩薩不答

曰菩薩方便具足五通隨順衆生一切形相而同其服亦隨一切衆生入於諸趣同其狀類大菩薩等隨衆生業報變化受身如尊者

拘摩羅陀所說偈言

諸趣悉變化 第七 唯除淨居天 二十一 隨業種種轉無處不受生

以是故知諸菩薩常同利益隨真受生而化導之以方便力但爲衆生不隨煩惱業報所繫如尊者提婆所說偈

或現作師長 或復爲弟子 以種種方便

爲化諸凡愚 自在於諸趣 常爲衆恭敬若不恭敬者 是大憍慢業

是以菩薩雖形服在俗應得禮敬猶如如來爲化衆生作若干種形亦如化佛迦沙王作老比丘形作瓦師形作力士形作琴瑟伎術

師形亦現種種在家人形雖爲種種無量形狀一切皆應恭敬禮拜是故雖同俗服應加禮敬如佛所說偈

嚴飾諸行而寂滅 調伏決定修梵行

於諸衆生捨刀杖 是名沙門婆羅門

是以於諸菩薩不應取其形狀相貌而生分別菩薩但爲三界衆生作大舍宅或化爲佛或化爲天人乃至化爲種種畜生一切皆應禮彼菩薩功德妙聚不應作心禮其狀貌如彼世人致禮形像遠敬法身豈存金石泥團土木而尊事乎是故菩薩以諸方便作内外形利益衆生禮無咎也是以如來非是涅槃

第七 生死苦長遠 應當入涅槃

以大慈悲力久住而不捨

是故當知隨生死久遠法身常住色身應現  
猶如燈滅是故菩薩法身勝於諸佛色身諸  
佛色身於欲界而成正覺菩薩法身住於淨  
居菩薩法身住於諸佛一切種智諸佛色身  
爲化衆生令諸釋梵四天王等皆悉恭敬是  
以佛說供養六十二億恒河沙諸佛色身不  
如供養菩薩一法身也如集一切福德三昧  
經中所說喜樂正法終不說佛入於涅槃如  
法華經中說偈

常在靈鷲山 及餘諸住處 凡愚無智者

雖在而不見

如入一切世界大莊嚴三昧經中說告善男  
子汝見如來法身不白言世尊唯然已見於  
一毛孔見億百那由他諸佛世界身口業等  
徧滿一切諸佛世界又如來密藏中說持速

疾菩薩觀如來頂上至無量諸佛世界猶不  
能見如目連尋如來說法音聲乃至野馬世  
界猶不能盡於佛音聲如首楞嚴經中所說  
如來處於宮中而現無量世界初生轉法輪  
入涅槃如密藏經中說如來法身住於一切  
衆生身中光影外現猶如淨綵裏摩尼珠無  
所障蔽亦復如是是故當知如來法身徧在  
一切諸衆生中如佛所說乃至枯樹焦木亦  
悉皆入不應生害況復餘類是故不應稱量  
衆生除諸如來無能知者如維摩詰所說一  
切佛土皆悉嚴淨此娑婆世界亦是大心衆  
生有如來藏故釋迦如來以善方便令諸聲  
聞大弟子等現五濁世諸外道等雖計一異  
如是人等一切身中亦有法身悉從菩薩善  
方便生皆爲顯發摩訶衍道是故當知菩薩

於三千大千世界教化衆生故種種不同若利根衆生爲讚大乘而無譏嫌令心易解若

鈍根衆生入邪見林著愚癡網得見諸佛菩薩因緣故滅諸邪見乃入大乘是故摩訶衍於諸乘中最爲根本若有衆生受持信解此大乘者當知是人業報煩惱皆悉消除如世尊爲阿闍世王解諸疑悔經中所說光相勿作是言何以故汝於餘佛世界十劫修諸禪定不如於此娑婆世界能一食頃修行慈心何以故於餘世界斷除煩惱亦復不如於此娑婆世界一食頃中修習善業如與文殊師利授記中說及餘諸經皆具分別若有衆生誹謗正法如般若經及法華中廣說其謗法過逆罪若能受持信解大乘乃至五無間等皆悉消盡如佛所說偈

所作重惡業 能深自悔責 敬信大乘法 拔除諸罪根

佛說如是真實法相信心次第相續連注皆悉空寂先所造惡即能消滅如世尊解除疑惑經中說也大王觀察汝心以何心殺父爲過去心未來心現在心耶若過去心過去心已滅若心已滅則無方所亦無住處若未來心未來心未至若現在心現在心不住譬如幻化非青黃赤白紫玻瓈色體性純淨乃至非相非可見如是廣說即得勝趣是故當知摩訶衍者是根本乘如彌勒莊嚴經中說發菩提心事解菩提心住菩提心得大利益不墮惡趣解菩提心淨菩提心從地至地漸增益而得法身能現神通如盧舍那佛所作變化而說偈言

若得無垢身

色像則無量

或出於閻浮

或處於兜率

從於定光佛

乃盡生死際

知時與非時

當知定光化

非是形色處

亦復非無相

悉由於本行

亦如水中月

身口意皆密

悉是不共法

一切諸世界

色身現解脫

持世諸天人

欲觀見佛頂

無邊不思議

過於億世界

目連諸弟子

至心求佛聲

亦過百千界

尋聲無邊際

法身功德業

一切無能知

不可以形類

言辭巧宣說

見聞唯佛力

非我之境界

念報佛恩者

頂戴信奉行

今我所說法

迴施諸衆生

悉滅煩惱結

得證無上道

入大乘論卷下

七

七

音釋

鉢稍

鉢莫

僕切

與矛屬

同蹠

蹠也

阿鞞跋致

鞞語

也此

蹠也

踴躍

踴也

踴子

六切

銅鐵

也與撻椎同

此云駢迷切

跋蒲撥切

蹠也此云

蹠又云鐘隨有瓦木

蹠渠焉切

蹠椎捷音鉢

蹠也此云

蹠渠焉切

蹠椎捷音鉢

蹠也此云

蹠渠焉切

蹠椎捷音鉢